

SCRIPT OF EVENING GOJRI NEWS BULLETIN 1AUG 1700 HRS

ایویننگ گو جری نیوز بلیٹن مو رخہ 1 اگست 2025

یوہ آکا شوانی جموں ہے عبدلرحمان تے نصرت چوہدری تیں خبر سُنو۔

HEADLINES

- ۱۔ نائب صدر جمہوریہ گو چناؤ 9 ستمبر نانہہ وے گو اس خاطر نامزدگی جمع کروان غی آخری تاریخ 21 اگست ہے۔
- ۲۔ پارلیمنٹ غا دواں ایواناں غی کاروائی بکھ بکھ معاملات ور حزب اختلاف غا احتجاج غے باعث اج واسطے ملتوی کردتی گئی۔
- ۳۔ وزیر اعلیٰ عمر عبداللہ نے اج احمدآباد مانہہ تاریخی سابرماتی آشرم گو دورو کیو تے مہاتما گاندھی نانہہ خراج عقیدت پیش کیو۔
- ۴۔ محکمہ سیاحت جموں نے یاترہ تے سیروسیاحت غا نواں مقام تے رستی متعارف کرایا ہیں۔ تانجے سیاحت نانہہ فروغ دتو جاسکے۔
- ۵۔ ادھمپور ضلع مانہہ شدید بارش غی وجہ سنگ گُج خاندان بے کھر ہوا ہیں کیونجے اُت مکان ٹیہ گیا ہیں تے خراب موسم غیوجہ سنگ اج ڈوڈہ تے کشتواڑ ضلعان گا سکول بند کردتو گیا ہیں۔

EC VP POLLS

بھارتی چناؤ کمیشن نے اج بھارت غا نائب صدر گا انتخاب غو منصوبو جاری کیو ہے بھارتی چناؤ کمیشن غے مطابق چناؤ 9 ستمبر نانہہ منعقد ویں غا تے چناؤ غو نوٹفیکیشن 7 اگست نانہہ جاری کی وجے غو تے امیدوار 21 اگست تیں اپنا کاغذات نامزدگی جمع کراسکیں گا کاغذات غی جانچ پڑتال 22 اگست نانہہ وے غی تے امیدوار اپنی نامزدگی واپس 25 اگست توڑی لے سکیں غا نالے ووٹاں غی گنتری 9 ستمبر نانہہ وے غی۔

LS RS ADJOURN

پارلیمنٹ غا دواں ایواناں نانہہ حزب اختلاف غی طرفوں بکھ بکھ معاملات ور ہنگامہ آرائی غے باعث دن پھر واسطے ملتوی کردتو گیو راجیہ سبھا نانہہ پہلاں دوپہر 12 بجے تک ملتوی کیو گیو تے بعد مانہہ پورا دن واسطے لوک سبھا غی کاروائی وی پہلاں دوپہر بعد بجے تک ملتوی ہوئیں تے بعد مانہہ پورا دن واسطے ملتوی کردتی گئیں جد راجیہ سبھا پہلاں دوپہر 12 بجے ملتوی ہون غے بعد دوبارہ اجلاس مانہہ بیٹھی تان حزب اختلاف غا ممبران نے فیرتیں تعرہ بازی شروع کردتی جن مانہہ بہار مانہہ ووٹر لسٹ غی خصوصی ت جامع نظر ثانی گا معاملہ ور بحث غو معاملو وی شامل تھو۔ جیساں ہی ہنگامہ آرائی بدھی تان ایوان نانہہ دن بہر واسطے ملتوی کردتو گیو راجیہ سبھا مانہہ پوزائٹنگ آفیسر آفیسر گھنٹشام تیواری نے اس بارے اس طرح دسیو لوک سبھا غی کاروائی بکھ بکھ معاملات ور حزب اختلاف غا شور شرابا سنگ متاثر ہو ئیں جد ایوان دوپہر 2 بجے پہلی بار ملتوی ہون تیں بعد دوبارہ اجلاس مانہہ آیو تان حزب اختلاف غا ممبران نے بہار مانہہ ووٹر لسٹ غ نظر ثانی ور بہت واسطے تعرہ بازی شروع کردتی ہنگامہ آرائی غا جاری رہن ور ایوان نانہہ دن پھر واسطے ملتوی کردتو گیو لوک سبھا غا سپیکر اووم برلا نے اس طرح کہیو۔

CM SABARMATI ASHRAM

وزیر اعلیٰ عمر عبداللہ نے اج احمد آباد مانہہ واقع تاریخی سابرماتی آشرم گو دورو کیو تے مہاتما گاندھی نانہہ خراج عقیدت پیش کیو اپنا دورا غے دوران وزیر اعلیٰ نے چرکھا ور روئی تیں گاتو کاتن غیوی کوشش کی چرکھو مہاتما گاندھی تیں وابستہ ایک طاقت ور علامت ہے سماجی میڈیا ور اپنا ایک پیگم مانہہ وزیر اعلیٰ نے کہیو کہ میں وی چرکھا ور پتھ آزمايو تے میرے کول وی ایک بہت صابر استاد تھو جنہاں نے مناں وی ویسی ہی روائی کتن سکھائی جسراں کہ گاندھی جی نے یوہ کئی براں پہلے کیو تھو۔

HAR GHAR TIRANGA

چیف سیکرٹری اٹل ڈلو غی صدارت مانہہ ایک اعلیٰ سطح میٹنگ منعقد ہوئی جس مانہہ ہر گھر ترنگا مہم 2025 غی تیاریاں غو جائیزو لیو گیو یام مہم 2 اگست تیں 15 اگست تک آزادی کا امرت مہا اُتسو تقریبات غا حصہ غا طور ور منائی جے گی چیف سیکرٹری نے اس مہم مانہہ ایک عوامی تحریک بنان غی ضرورت ور زور دتو۔ تے شہری و دیہی علاقان مانہہ تمام سرکاری محکماں گی شمولیت مانہہ یقینی بنان غی ہدایت دتی اُنہاں نے سکول غا بچان نوجوانان تے زندگی غا تمام شعباں سنگ تعلق رکھن آلا شہریاں غی شرکت بارے اپیل کی تانجے قومی فخر اتھاد تے حب الوطنی غا جذبہ مانہہ فروغ دتو جاسکے ہر گھر ترنگا 2025 مہم ترے بکھ بکھ مراحل مانہہ 2 تیں 15 اگست غے بشکار چلائی جے غی۔

SAMPOORNA ABHIYAAN

ضلع انتظامیہ پونچھ نے نیتی آیوگ غا اشتراک سنگ اج شمپورنتا ابھیان سمان سمارو غو انعقاد کیو تانجے بکھ بکھ سرکاری سکیمیاں غے تحت ضلع غی مکمل عمل آوری غی کامیابی غو اعتراف تے جشن منایو جاسکے اس موقع ور آکنکشا ہاٹ غو افتتاح کیو گیو جہیرو مقامی کاریگراں مانہہ باختیار بنان واسطے ایک پلیٹ فارم بے جل شکتی تے قبائلی معاملات غا وزیر جاوید رانہ اس موقع ور اُت مہمان خصوصی تھا جنہاں نے اپنی تقریر مانہہ سمپورنتا ابھیان غی کامیاب عمل آوری ور جلع انتظامیہ غی کوششاں مانہہ سپرایو۔ اُنہاں نے منکوٹ بلاک مانہہ جموں کشمیر یوٹی مانہہ پہلاں تے بہار پھر مانہہ نواں مقام ور آن ور تمام افراد مانہہ مبارک باد دتی اس بارے بولتا واں وزیر موصوف نے اس طرح کہیو۔

JAMMU TOURISM CIRCUIT

روحانی سیاحت مانہہ فروغ دین دین واسطے جموں محکمہ سیاحت نے ایک نوو سیاحتی سرکٹ جاری کیو بے جہیڑو ریاسی جموں ادھمپور سانبہ ضلاع غا اہم مقامات ور مشتمل بے یوہ سفر پنج دنان مانہہ 389.5 کلو میٹر ور پھیلو وی بے جس غے ذریعے یاتری صرف ریاسی مانہہ شری ماتا ویشنو دیوی مند غا پی نہیں بلکہ نو دیوی مندر بابا دناسر شیو کھوڑی مند گوری گنڈ مانتلائی سُدھ مہادو کرمچی مندر جیسا دیگر اہم مزہبی مقامات ور وی جاسکیں گا۔ خوبصورت رستاں ت مقدس مقامات غے نال یوہ سفر عقیدت دریافت تے روحانیت تیں جڑن گو ایک خاص تجربو فراہم کرے غو سیاحت مانہہ مزید فروغ دین واسطے محکمہ نے ایک 479 کلو میٹر لمو سیر و تفریحی سرکٹ وی شروع کیو بے جہیڑو علاقہ غی بہترین سیاحتی مقامات ور مشتمل بے یوہ سرخت پنج دنان مانہہ مکمل وے غو جس م، انہہ پنچیری ت چناصر مانہہ رات گزارن غی سہولیات وے غی تانجے سیاح مکمل لطف چا سکیں اس رستہ غی اہم جھلکیاں مانہہ تارکی چناب ریل پل پتئی ٹاپ بابو فوٹ تے گھرانہ آبی پرنداس غی رہن آلی جگہ جیسا مقامات شامل ہیں۔

AMARNATH YATRA SUSPENDED

خران موسم غی وجہ تیں جموں تیں امرناتھ یاترا اج دوجے دن وی معطل رہی کسی وی نوو یاتری مانہہ جنوبی کشمیر غا ہمالیائی علاقہ مانہہ واقع امرناتھ گپھا دروانہ نی کیو گیو دوجا شہراں تیں آیا واں یاتریاں مانہہ بھگوتی نگر بنیادی کیمپمانہ سخت حفاظتی انتظامات غے تحت روکیو گیو بے جتوں اُنہاں مانہہ موسم بہتر ہون ور پہلگام تے بالتال گا کیمپاں در روانہ کیو جے گو بُن توڑی 4 لکھ تیں متی یاتریاں نے امرناتھ گپھا مانہہ طرف تیں بنیا لنگم غی پوجا کی بے تے یاہ یاترا 3 جولائی تیں شروع ہوئی تھی جہیڑی 38 دنان ور مشتمل بے۔

WEATHER TRENDS

برسات غا موسم مانہہ 1 جون تیں 31 جولائی توڑی جموں کشمیر مانہہ بارش غا مختلف اعدادو شمار ریکارڈ کیا گیا 4 تیں 6 اگست غے بشکار وسیع پیمانہ ور بارش غی پیش گوئی کی گئی بے جس مانہہ گجھ علاقان مانہہ تیز بارش ہون گا امکان ہیں آکاشوانی جموں غا نمائندپ غے مطابق ادھمپور ضلع غا ترالا گراں مانہہ شدید بارشاں تیں بعد کئی مکان بُری طرح متاثر ہوا ہیں اس تیں علاوہ ڈوڈہ تے کشتواڑ

ضلاع غی ضلعی انتظامیہ نے خراب موسم غے پیش نظر طلبہ تے عملہ غی حفاظت واسطے اج
ضلاع غا تمام سرکاری تے نجی سکول بند رکھن غو حکم دتو ہے۔

BAGLIHAR GATES OPEN

رامبن ضلع مانہہ شدید بارش تیں بعد بگلیار پن بجلی پروجیکٹ غا تمام پانی جھوڑن آلا دروازہ کھول
دتا ہیں حکام نے عوام واسطے ہدایت جاری کی ہے کہ دریا چناب تے اس غا معاون ندیاں غا کناران تیں
دور ریں کیونجے خطرہ غواندیشو ہے اس بارا مانہہ ایڈیشنل ڈپٹی کمشنر رام بن ورون جیت سنگھ چارک
نے اطلاع دتی ہے محکمہ مال پولیس ایس ڈی آر ایف تے دیہی ترقیاتی محکمہ گا افسران نانہہ ہدایت دتی
گئی ہے کہ صورتحال ور مشترکہ نگرانی رکھیں مقامی لوک خاص طورور جانور پالن آلاں تے گٹیاں
چلان آلاں تیں کہیو گیو ہے کہ دریا غے قریب نقل و حمل تیں گریز کریں تانجے کسی وی قسم غا نقصان
تیں بچیو جاسکے۔

NEWS READ BY ABDUL REHMAN
NEWS READ BY NUSRAT
NEWS EDITOR KUNAL SHRIVATSA
SKILLED RAJAT
TECH ASST QUDRAT
DEO NUSRAT